

12 da favrer 2019

## Ura da dumondas dal cussegl grond dal Grischun

### Dumonda dal deputà Atanes concernent l'organisaziun da l'assistenza en il convict Quadrin

#### *Dumonda*

Il convict porscha in segund dachasa a las scolaras ed als scolars da scola media che derivan da las regiuns perifericas.

Actualmain sa chatta il convict en stabiliments provisorics sin l'areal da la scola chantunala.

Quels dattan dimora a fin 100 scolaras e scolars.

Co è organisada l'assistenza da las scolaras e dals scolars en il convict Quadrin?

*President da la regenza Parolini:* Bun di ensemen. I suonda la resposta a la dumonda dal deputà Manuel Atanes concernent l'organisaziun da l'assistenza en il convict Quadrin:

La basa giuridica per manar in convict sa chatta en l'art. 11 da la lescha actuala davart las scolas medias. Il convict da la scola chantunala grischuna è part dal manaschi d'abitar e d'alimentaziun da l'uffizi per la furmaziun media-superiura. Il convict vegn manà da las collavuraturas e dals collavuratur dal manaschi d'abitar e d'alimentaziun e porscha en ils Quadrins in'assistenza da dumengia saira fin venderdi suentermezdi. Questa assistenza na cuntegna per regla nagin sustegn direct per la scola, quai che pretenda ina gronda autonomia da vart da las abitantas e dals abitants. La media da vegliadetgna importa il mument da l'entrada ca. 15 onns. En il convict cuntanschan ils giuvenils per regla lur maiorenitad. Durant las vacanzas da scola da la scola chantunala grischuna è il convict serrà. Il convict è cuntanschibel per telefon durant 24 uras e pia er en cas d'urgenza. L'assistenza vegn surpigliada dal manader dal sectur d'abitar, che dispona d'ina scolaziun en pedagogia sociala, sco er da personas che lavuran en ils differents secturs dal convict. Tgi che frequenta la scola chantunala grischuna, sto impunder bier temp per emprender. Lezias e pensums, preparaziuns per examens sco er lavurs da semester marcheschan il decurs dal di ordaifer il temp da scola e ston vegnir liquidads en moda autonoma. Per emprender ston vegnir investidas tenor l'experiencescha ina fin trais uras per di. En ils Quadrins dispona il convict d'in local da segiurn e d'emprender. Quel stat a disposiziun senza restricziuns. En il temp liber pon ins far activitads sportivas e musicalas e dar gieus. Ultra da quai organisescha il team dal convict differentas occurrenzas ed excursiuns per ils giuvenils. Ensolver, gentar e tschaina datti en la mensa "Münzmühle", che procura per in nutriment varià e saun.

Ina buna communicaziun è da gronda impurtanza en in manaschi d'abitar. Ella ha lieu en il rom da discurs persunals tranter il team dal convict ed ils giuvenils sco er las personas responsablas per lur educaziun. Ulteriurs instruments d'infurmaziun èn

la pagina d'internet dal convict, moniturs d'infurmaziun, fegls d'infurmaziun, scuntradas d'infurmaziun sco er brevs als geniturs, che vegnan tramessas er a la direcziun da la scola ed a las persunas d'instrucziun da la scola chantunala grischuna. Durant las uras d'avertura è ina persuna dal team dal convict adina cuntanschibla per dumondas. Las direcziuns da manaschi dals secturs d'abitar resp. d'alimentaziun discurren regularmain cun la direcziun da la scola chantunala grischuna.